

庚辰霰雨前一日以爲

靜丞仁兄大人四句題辰誌慶

陳寶銀

弟 關維恭 拜 贈

孟昭崑

曾文正公全集

卷一六五
冊八

曾文正公雜著目錄

卷二

初定營規二十二條

戊午

營規

己未

營制

己未

馬隊營制

己未

查拏瀏陽徵義堂餘匪示

癸丑

禁止城中賽會示

癸丑

禁譌傳遏糴示

癸丑

催完錢糧示

癸丑

禁擄船告示

癸亥

金陵房產告示八條

乙丑

勦擒告示稿

乙丑

勦擒告示四條

乙丑

禁私押告示式

己巳

保守平安歌三首

壬子

水師得勝歌并序

乙卯

陸軍得勝歌

丙辰

愛民歌

戊午

解散歌

辛酉

格言四幅書贈李芋仙

辛酉

書贈仲弟六則

戊辰

勸誡淺語十六條

辛酉

勸學篇示直隸士子

己巳

直隸清訟事宜十條

己巳

曉諭新募鄉勇

甲寅

諭九江賊目林啟容

丙辰

諭巡捕門印簽押三條

庚申

諭天津士民

庚午

照復洋人

庚午

將赴天津示二子

庚午

初定營規二十二條

紮營六條

紮營要在山岡不可在低溼之處不可在四面平曠毫無遮護之處

看營盤者插竿牽繩周圍牽一繩牆長夫到時卽照繩牆築立營盤

正牆腳寬六尺子牆腳在內頂寬一尺五寸子牆頂寬二尺正牆高七尺子牆高三尺五寸

外壕寬六尺深入尺內壕寬三尺深三尺凡挖濠之時每隔二丈畱橫路一道挖畢之時內濠仍畱橫路外濠概行挖去

凡一營只開二門不許太多門外築一灣牆營內支帳房兩層外層向牆開門內層向中開門各畱大路以便出隊營外每百人挖茅廝一箇三箭之外牽繩牆一道凡買賣閑人概不許入繩牆之內

開仗五條

出隊要分三大支臨時再多分幾小支凡有房屋之處須分一支以防埋伏小山之後須分一支樹林之中須分一支隊伍要佔住山坡排立不動營官要四處往來登高瞭望打仗要打箇穩字賊吶喊我不吶喊賊開鎗我不開鎗賊來衝撲時撲一次我也站立不動撲兩次我也站立不動穩到兩箇

時辰自然是大勝仗

前隊用好手五百以備衝鋒後隊要好手五百以備救敗中間大隊略弱些也不妨前隊若小挫後隊好手出去救敗前隊若得勝後隊好手不動專等收隊時在梢尾行走

刀矛對殺之時要讓賊先動手我後動手頭一下已過第二下未來之時我撥他頭一下正好殺他

行路三條

六成隊伍走頭一段四成隊伍走尾一段鍋帳擔子走中一段頭次探馬帶七八人先走二十里二次探馬先走十里如遇賊來頭探先行回報二探再去查明虛實續報如左右有岔路頭

探遣人分路去如有兩三條岔路遣兩三起人去探明看定營盤頭探插竿牽繩

大軍行畢五里之後派一將官押尾不許有一人落尾旗之後途中不許有一人進店喫飯

守夜三條

紮營之處凡有來路派人於五里之外守卡四五更時另派親信人查卡

每棚派兩人守上半夜派兩人守下半夜不許打更止許走籌傳令者大聲接令者低聲每夜派哨官四人巡更從二更起每哨官巡一更周圍巡查查本哨兼查別哨之勇

起更卽關營門無論客來文書來均不許開營門賊來不許出
隊不許點燈不許吶喊說話悄悄靜靜預備鎗礮火毬看準再
打

軍器五條

鎗礮要試過三十次方免炸裂羣子要包緊合膛

矛桿要樹的不要竹的要整樹直紋不要橫紋

鋤要八寸長三寸寬鋤要八寸長六寸寬挑土用四方布袋盛
子藥用生漆皮桶

旗幟要一色不宜混雜

刀矛要常磨火藥要常晒火毬要親手自製

營規

招募之規

二條

招募兵勇須取具保結造具府縣里居父母兄弟妻子名姓箕斗清冊各結附冊以便清查

募格須擇技藝嫻熟年輕力壯樸實而有農夫土氣者爲上其油頭滑面有市井氣者有衙門氣者概不收用

日夜常課之規

七條

五更三點皆起派三成隊站牆子一次放醒礮聞鑼聲則散

黎明演早操一次營官看親兵之操或幫辦代看哨官看本哨之操

午刻點名一次親兵由營官點或幫辦代點各哨由哨長點日斜時演晚操一次與黎明早操同

鐙時派三成隊站牆子一次放定更礮聞鑼聲則散

二更前點名一次與午刻點名同計每日夜共站牆子二次點名二次看操二次此外營官點全營之名看全營之操無定期約每月四五次

每夜派一成隊站牆唱更每更一人輪流替換如離賊甚近則派二成隊每更二人輪流替換若但傳令箭而不唱者謂之暗令仍派哨長親兵等常常稽查

紮營之規

八條

紮營之地忌低窪潮濕水難洩出忌坦地平洋四面受敵忌坐山太低客山反高忌斜坡半面礮子易入

紮營之地須擇頂上寬平旁面陡峻者

四面陡峻者難得或擇一面二面陡峻亦好

背山面水者

兵法右背山陵前左水澤亦難擇此好地但

擇砍

柴挑水便益者

汲道最關緊要如爲賊所斷則不可守

每到一處安營無論風雨寒暑隊伍一到立刻修挖牆濠一時

成功未成之先不許休息亦不許與賊搦戰

牆子須八尺高一丈厚築牆子不用門板竹木裡外皆用草坯

土塊砌成中間用土築緊每築尺餘橫鋪長條小樹庶免雨後

崩裂之患上有鎗礮眼內有子牆爲人站立之地

濠溝須一丈五尺深愈深愈好上寬下窄濠中取出之土須覆於二丈以外不可太近不可堆高恐大雨時客土仍流入濠中也

花籬用木須麤大約長五尺餘埋土中約深二尺堅築旁土以攀搖不動爲主或用二三層或用五六層

凡牆子濠溝花籬三者闕一不可牆子取其高而難登也濠溝取其深而難越也花籬取其難遽近前也曰壘曰壁曰土城名雖不同皆牆子之類也曰池曰塹曰陷馬坑

不甚寬長其上虛鋪以土

曰梅

花坑

亂挖深坑約四五尺大小無定

名雖不同皆濠溝之類也曰木城

立木圓排周圍

如曰柵

亦係立木不必周圍皆有

曰梅花樁

亂釘者曰梅花樁分層次者曰花籬笆

曰鹿角

之樹

有杈
者

曰拘馬椿曰拒馬曰檔木

中有橫木用小木
斜穿以架於地

曰地刺

用竹
削尖

釘於
地

曰鐵蒺藜曰鐵菱角名雖不同皆花籬之類也牆子只可

修築一道濠溝則兩道三道更好花籬等則五層六層更好

一營開兩門前門宜正大後門宜隱僻營官中軍帳對前門中
畱甬道宜闊親兵各棚紮甬道兩旁前哨紮前門後哨紮後門
左哨紮左右哨紮右兩帳相距略寬以畱水火之路營外開廁
數處宜遠營內開廁兩處專備夜閒之用火藥挖一地窖上覆
草棚用泥塗之仍安氣眼免其潮濕

行路之規

三條

凡拔營時以七成隊預備打仗以三成隊押夫若賊在前則七

成隊走前鍋帳担子走中間以三成隊在後押之若賊在後則以三成隊走前押鍋帳担子同行畱七成隊在後防賊如有十營八營同日拔行則各營七成隊伍分班行走不許此營之隊參入彼營隊中尤不許鍋帳担子參入七成隊中至押夫之三成隊專押本營之鍋帳担子不許此營與彼營混亂

凡拔營須派好手先走或營官或統領或哨官哨長皆可擇其善看地勢善看賊情者向前探看在大隊之前十里或二十里仔細看明一探樹林二探村莊恐有賊匪埋伏在內身邊帶七八箇人每遇一條叉路卽派一人往看若遇過橋過渡尤須謹慎恐大隊過水之後遇賊接仗進則容易退則萬難

每營派一弁在後押尾凡鍋帳担子過完之後查明恐有病者落後又恐本營勇夫在後滋事又恐游勇假名滋鬧

禁擾民之規

用兵之道以保民爲第一義除莠去草所以愛苗也打蛇殺虎所以愛人也募兵勦賊所以愛百姓也若不禁止騷擾便與賊匪無異且或比賊匪更甚要官兵何用哉故兵法千言萬語一言以蔽之曰愛民特撰愛民歌令兵勇讀之歌曰

歌見後

禁洋煙等事之規

七條

禁止洋煙 營中有吸食洋煙者盡行責革營外有煙館賣煙者盡行驅除

禁止賭博

凡打牌押寶等事既耗錢財又耗精神一概禁革

禁止喧嘩

平日不許喧嚷臨陣不許高聲夜間有夢魘亂喊

亂叫者本棚之人推醒各棚不許接聲

禁止姦淫

和姦者責革強姦者斬決

禁止謠言

造言謗上離散軍心者嚴究變亂是非講長說短

使同伴不睦者嚴究張皇賊勢妖言邪說搖惑人心者斬

禁止結盟拜會

兵勇結盟拜會鼓眾挾制者嚴究結拜哥老

會傳習邪教者斬

禁止異服

不許穿用紅衣綠衣紅帶綠帶不許織紅縹線不

許紮紅綠包巾印花包巾不許穿花鞋

稽查之規 五條

查號補小印 號補上有大印數字各營皆然其每營官又須另有小印私記印於補上以便稽查

查口號 每夜發二字做口號查營時遇著人來低聲呼上一字來者卽低呼下一字應之錯者登時拏問以防奸細若人多混雜之地日閒亦發二字做口號以便稽查

查街 每日派什長及親兵數人至營盤附近街市稽查如有擾民者吸洋煙賭博者立卽拏回究辦

查出營 各勇必掛號執票方准出營如守門人不驗票擅放者重責各勇夫不服查者責革

查私畱外人 各勇夫如有親友來營須報明本什長哨長至
營官處掛號方准畱宿違者重究

營制

一營之制

營官親兵六十名親兵什長六名分立前後左右四哨哨官四員哨長四名護勇二十名什長三十二名正勇三百三十六名伙勇四十二名一營共五百人營官一員哨官四員在外

營官親兵之制

親兵六隊一隊劈山礮二隊刀矛三隊劈山礮四隊刀矛五隊小鎗六隊刀矛每隊什長一名親兵十名伙勇一名計六隊共七十二名

一哨之制

前後左右四哨每哨哨官一員哨長一名共護勇五名伙勇一名每哨八隊一隊抬鎗二隊刀矛三隊小鎗四隊刀矛五隊抬鎗六隊刀矛七隊小鎗八隊刀矛每隊什長一名伙勇一名其抬鎗隊正勇十二名合什長伙勇爲十四名其刀矛小鎗隊正勇十名合什長伙勇爲十二名每哨一百零八人計四哨兵四百三十二人

長夫之制

營官及幫辦人等共用長夫四十八名搬運子藥火繩及一切軍裝等項共用長夫三十名

親兵每劈山礮隊用長夫三名每刀矛小鎗隊用長夫二名計

六隊共長夫十四名如拔營遠行營官另撥公夫幫抬劈山礮
哨官哨長及護勇五人共夫四名四哨共夫十六名每抬鎗隊
用長夫三名每刀矛小鎗隊用長夫二名計四哨抬鎗八隊共
長夫二十四名刀矛小鎗二十四隊共長夫四十八名
以上各項共長夫一百八十名五百人一營計每百人用夫三
十六名只許減少不許增多

薪水口糧之制

營官月給薪水銀五十兩不扣建又月給辦公費銀一百五十
兩不扣建凡幫辦及管賬目軍裝書記醫生工匠薪糧並置辦
旗幟號補各費在內聽營官酌用

哨官每員日給銀三錢

哨長每名日給銀二錢

什長每名日給銀一錢六分

親兵每名日給銀一錢五分

護勇每名日給銀一錢五分

正勇每名日給銀一錢四分

伙勇每名日給銀一錢一分

長夫每名日給銀一錢

以上大建月支銀二千八百九十二兩二錢小建月支銀二千八百零二兩四錢六分

軍中浪費最忌官員太多夫價太多今立定限制無論官多官少官大官小凡帶千人者每月支銀不准過五千八百兩凡統萬人者每月支銀不准過五萬八千兩凡帶百人者用長夫不准過三十六名凡帶千人者用長夫不准過三百六十名

小口糧及卹賞之制

凡新立營頭奉札招勇挑定後無論勇夫每名每日給小口糧錢一百文帶至大營上憲派員點名後再行起支大口糧凡陣亡者卹銀三十兩受傷頭等者賞銀十五兩二等者銀十兩三等者銀五兩成廢者另加

外省招勇倣照楚軍薪糧之制

湖北江西安徽等省招勇在本省勦賊者照楚軍章程不減者
凡五項

營官薪水辦公費每月支二百兩

不減

哨官每日支三錢哨長每日支二錢

不減

什長每日支一錢六分

不減

伙勇每日支一錢一分

不減

長夫每日支一錢

不減

其照楚軍章程酌減二分者凡兩項

親兵護勇每日支一錢三分

已減二分

出境至

正勇每日支一錢二分

已減二分

出境至

外省勦賊則全不減

帳棚之制

營官幫辦書記軍火等共用夾帳棚八架單帳棚二架

哨官哨長護勇共夾帳棚一架單帳棚二架四哨同親兵每隊夾帳棚一架單帳棚一架六隊同

正勇每隊單帳棚二架三十二隊同

以上共夾帳棚十八架單帳棚八十架

統領之制

凡統領自帶一營本營之薪水公費及夫價已足敷用此外從優酌加凡統至三千人以上者每月加銀百兩加夫十名統至五千人以上者每月加銀二百兩加夫二十名統至萬人以上

者每月加銀三百兩加夫三十名

凡此二十名無差錯人

凡此二十名無差錯人

凡此二十名無差錯人

凡此二十名無差錯人

凡此二十名無差錯人

凡此二十名無差錯人

凡此二十名無差錯人

凡此二十名無差錯人

凡此二十名無差錯人

凡此二十名無差錯人

馬隊營制

一 壹營拾哨每哨官給馬壹匹壹哨馬勇貳拾肆名每名給馬壹匹營官親兵捌名每名給馬壹匹

一 營官月給薪水銀肆拾兩公費銀肆拾兩馬肆匹馬夫貳名火夫壹名長夫捌名

一 幫辦壹員月給銀拾陸兩馬壹匹長夫壹名

一 字識壹名月給銀伍兩

一 哨官拾員每員月給銀玖兩陸錢雜費銀壹兩貳錢馬夫壹名棚夫壹名

一 先鋒官伍員每員給馬壹匹月給口糧銀伍兩肆錢雜費銀

陸錢伍人共爲壹棚馬夫貳名火夫壹名棚夫壹名

一親兵捌名每名給馬壹匹日給銀壹錢肆分雜費銀月給陸錢以肆名爲壹棚每棚馬夫貳名火夫壹名棚夫壹名

一步隊親兵什長壹名日給銀壹錢陸分步隊親兵拾名日給銀壹錢伍分共爲壹棚火夫壹名此專備營官差遣及出隊時畱守營盤之用毋許再向各哨派人當差

一馬勇日給銀壹錢肆分雜費銀月給陸錢每肆名爲壹棚馬夫貳名火夫壹名棚夫壹名

一搬運軍械草料公長夫肆拾名凡長夫每名日給銀壹錢火夫每名日給銀壹錢壹分

一營官領藍夾棚貳架白單棚壹架幫辦領藍夾棚壹架白單棚壹架馬隊親兵領白單棚貳架馬圈棚子貳箇步隊親兵領白單棚貳架每哨領藍夾棚壹架白單棚陸架馬圈棚子柒箇

一每營月給燭壹伯伍拾觔油貳伯觔

一每營百馬之內每年准報倒斃叁拾陸匹如數換領以資彌補另於哨弁兵勇雜費銀內每月扣出叁錢作爲添補馬匹公項名曰朋馬銀營官總理其事月派哨官一員輪流經管遇有馬匹額外倒斃及病瘦不堪馳使者卽行抽撥此項隨時採買添補

一每馬月給麩料草豆銀貳兩每年叁肆伍等月青草正茂可
以放食每馬減銀伍錢只給壹兩伍錢

一馬醫鐵匠號掛旗幟大小掃把鐵刮竹槽出自營官公項

一修補鞍上坐褥布屨後鞦轡頭哨官兵勇自辦

一籠頭偏纏哨官兵勇自辦

一馬藥錢營官出自公費哨弁兵勇出自雜費

一更換鞍橋油皮韉肚帶及拴肚帶寬皮條拴蹬窄皮條皮扎

鐵嚼全副馬鎗弓箭腰刀扎草刀草料口袋由軍械所辦給

一凡紮營之處先擇斜坡掘地二弓以爲馬圈可拴四馬兵勇
之棚卽與馬圈棚子相對哨官之棚亦與哨官馬圈相對凡

支馬圈之時兵勇四名與馬夫貳名親自鋤挖如馬圈辦理
不妥將該哨官分別嚴懲

查拏徵義堂餘匪示

爲搜查餘匪事照得徵義堂匪徒雖經大兵勦滅而首犯尙有未獲餘匪亦多未淨前因各鄉團查拏匪黨閒有報復仇怨譌索銀錢之事本部堂出示嚴禁妄拏非謂匪黨可以不捕不株累無辜之平民乃所以致嚴於真正之堂匪也近聞古港之局紳各鄉之團總畏縮不前查拏日懈因本部堂有妄拏之禁而遂謂真匪亦可以不拏是猶病者因服藥之誤而遂謂凡病皆可以不藥殊失我分別良莠之苦心也今欲重加整頓再爲誅除差役下鄉則恐閭閻之被累兵勇臨境又恐玉石之俱焚再四思維仍當責成古港之局紳各鄉之團總令其同心踴緝協

力搜查庶幾耳目既真擒拏亦易爲此示仰局紳團總人等知悉爾等滌慮洗心立盟設誓務期明可以質天地幽可以質鬼神上可以對祖宗下可以對孫子儻其妄拏一人妄牽一家不特不能逃 國法之森嚴亦難逃神明之誅殛不特不能逃鄉里之控告亦斷難逃本部堂之訪聞若其真正之堂匪著名之要犯自應窮搜力捕不畱餘孽雖逃往他縣亦宜越境追之雖藏匿深山亦宜設法捕之其有兩次賞格俱未列名而實係堂內要犯者準其一體擒拏其有賞格雖經列名而實未入堂爲匪者許該紳等公同取保永不查拏凡人之心跡愈久愈明果是匪黨雖父兄不能曲護果非匪黨雖仇人不能栽誣其有曾

經入堂而並不爲匪者宜開一線之恩予以自新之路取戶族之保結爲良民之實據其有經官保釋及各團保釋未拏者各宜改過而悛非毋得怙惡而取戾若有負固不服藉口報復與局紳爲仇與團眾爲敵拒捕戰鬪情同叛逆立即奔告本部堂行轅寅時來告卯時發兵痛加勦洗誅及妻孥是彼之自外生成非我之好行殺戮也本部堂刻有鄉團執照族團執照爾瀏陽各鄉選舉公正廉明之人前來具領清查戶口稽察匪類細加剖別大彰公道領此照者準其搜拏堂匪未領照者不許妄拏爾士民等體我苦衷慎之又慎於除惡務盡之中寓生道殺人之意一年之內不可鬆懈一犯之疑不可疏忽無貽後日之

悔永保百年之安本部堂有厚望焉心之曲折筆不能達兢兢業業千萬千萬毋違特示

禁止賽會告示

爲禁止賽會事照得湖南被賊以後瘡夷未復官民上下各宜
儆戒節儉以惜物力恐懼以返天和庶幾挽回於萬一所有向
來迎神賽會淫樂奢靡之風應卽嚴行禁止爲此示仰軍民人
等知悉如有賽會之議卽遵照停止儻敢故違定將倡首承
辦之人嚴拏究辦決不寬貸各宜凜遵無違特示

...

禁譌傳遏糶告示

爲曉諭事照得設兵所以衛民足兵尤貴足食三者相輔而行不容稍有偏廢曩因金陵城外賊船回竄上游長沙爲水陸交通衝之地適遇青黃不接之時守禦固應加嚴日食尤關緊要是以調集各路兵勇保我黎民嚴禁出城米鹽以實儲備作未雨綢繆之計實欲藉以衛民非欲以累民今值大兵雲集新穀將登正當籌備軍糈吃緊之際訪聞城廂內外因有穀米不準出城之示譌傳不準販運入城以致商運不至兵食維艱並恐惟利是視之奸民藉此欺騙無知之花戶短價販運接濟盜糧關係匪輕合亟示諭爲此示仰商民人等知悉嗣後爾等仍各販

運穀米入城照常交易不得輕聽浮言自誤生理其在城各米
如實係鄉民買食二三石亦準照舊疏通出城但不準賣給賊
船致干查究本部院諄諄告誡無非念切民生爾等共各懍遵
共圖保衛毋違特示

催完錢糧告示

爲嚴催早完 國課事照得粵匪稱亂以來糜費 國帑四千餘萬

皇上省宮中之服用發內府之帑項不惜罄其所藏冀爲生民除害卽 王公大臣文武官員無一人不裁減廉俸無一人不捐助軍餉而獨於百姓格外體恤田不加賦戶不抽丁不特不加賦已也水旱偏災之縣又有蠲緩之條賊匪經過之區復有寬免之典不特不抽丁已也被脅之良民免其罪而資遣之被兵之難民憫其窮而撫卹之凡在百姓想亦共聞之而共知之矣自古以來治日常少亂日常多或十餘年而一遇兵戈或數

十年而一逢劫數獨至我朝二百餘年同享昇平之福高曾祖父未曾見干戈鋒鏑之場老弱壯丁未曾經轉徙流離之苦雍正乾隆年間普免天下錢糧四次嘉慶道光年間豁免民間積欠六次咸豐元年正月亦豁免民間積欠錢糧合計十八省州縣之賦共免三千萬積欠之銀上考秦漢下至前明孰有如我朝之國泰民安孰有如我朝之深仁厚澤乎百姓欲報天家之德必須早完維正之供乃近聞民間完納國課每多遲延抗玩或下忙已過而上忙未輸或前年積欠而今年猶展或藉口於旱澇之微災而以為可緩或藉口於書差之浮收而以為可減或賄差役不使帶人入城以免追比之苦或詭換冊

名不使糧戶之有著以免追呼之煩種種抗延殊堪深恨尤有
可爲痛恨者一種無賴之游民滋事之痞棍聚集村市三五成
羣動稱世界已亂不必完錢糧愚民無知將信將疑亦或將應
完之課故爲遲延不可不嚴行諭禁爲此示諭仰我省紳民人
等知悉務當互相督勸早完錢糧族長戒其一族團總催其一
團無因書差稍有浮收遂並本分而不交無因家資稍覺艱難
遂並正供而不納子貧而斷父母之養膳者必非孝子民貧而
欠 皇家之錢漕者必非良民本部堂旣以好言誥誠於前卽
以刑法懲責於後如有不趕緊完納者飭各州縣三日一比嚴
刑重責幽之囹圄之中治以軍流之罪如有游民痞棍倡爲莠

言謂世界已亂不必完糧者一經拿獲卽行正法非本部堂之
過嚴也造此言者卽從賊之亂民也爾紳民人等敬聽余言互
相傳述 聖朝之恩斷不可負抗欠之罪斷不少寬凜之慎之
無違特示

禁止擄船告示

同治二年四月

爲嚴禁事照得近來各營弁勇擄船之風日甚一日或并無差
事擄船而賣放或多攬貨船闖關而包釐卽有統領營官在途
同行亦復縱容兵勇魚肉船戶無論重載之船家眷之船養病
之船送柩之船一概強擄訛索或本係上水而強之下行或本
係小划而強之遠行甚至驅逐客商攘佔貨物又有游勇土匪
假冒各營之名到處擄船長江大湖支河小港騷擾幾徧商民
久含怨怒釐稅因之大減船戶固不聊生軍士亦將饑餓急應
嚴行禁革以肅軍政而裕釐餉嗣後各營將弁勇丁或奉差馳
起他處或自楚募勇東來一概不准擄船只准民價和雇如敢

故違定以軍法從事本部堂一面派員嚴拏一面行知各縣各
卡如有前項情弊許該縣該卡拏獲正法後再行通稟其非本
部堂所轄之營亦經咨商一律嚴辦合行出示曉諭各宜凜遵
毋違特示

金陵房產告示八條

爲曉諭事照得金陵房產章程前於去年七月議立七條復於十一月議立四條出示曉諭在案其中尙有不便於民者茲本部堂復加體察將七月所定七條內刪去三條十一月所定四條內刪去一條酌改一條合行示諭爲此示仰居民人等一體遵照特示

一城內房產如原業主持有舊契准赴善後局呈明由局派員會同縣令往查與契符合注明驗訖字樣蓋用局印縣印准其管業如無印契實係業主取具鄰佑切結赴局呈明派員會同縣令確查給予單照蓋用局印縣印亦准執單管業

一城內房屋有現任大員權作衙署及辦公委員權作公局者
卽有業主亦暫不准領還從呈明驗契蓋印之日起每月按
照民價給予租錢俟另行修立衙署公局後再行給還業主
一偽府賊館有一所而佔數家地基者亦有原係一家而分爲
數所者令各赴局呈明驗契委員會同首縣勘驗明白或各
管原業或情願捨少就多割彼與此由民間自行議定呈明
總局飭縣立案

一房屋未經焚毀尙屬完好者無論大屋小屋新造舊造一概
不許拆毀有擅拆強毀者拏獲正法棹椅木器不許兵勇搬
出城外如違重懲

一城廂內外空地如有客民願造房屋者先赴善後局呈明卽派保甲局委員履勘該地尙未有人認業者暫作官地視地之廣狹酌定租價刊刻雙聯執照載明丈尺若干地租若干照根存善後局正照給客民收執准其蓋屋自此次出示之後如有未經呈明擅將無主空地起造新屋者除將房料充公外嚴行枷責若拆毀舊屋移造新屋者立正軍法其前此已造之屋亦限於年內呈明善後局勘地起租俟有原業主出來分別核辦至新年查出無照之屋亦將房料充公

一空地新造之屋如原地主歸來赴善後局呈明派保甲局委員確切查明卽將善後局所議地租交原地主承管所造之

屋或新屋主酌找地價或舊地主酌找屋價和商定議各聽
自便其親族代認者呈明後准其立案不准領照自克復日
起扣足兩年無人來認再行核辦

一舊存之屋無契據者若專以鄰佑爲憑又恐賄串互保弊竇
叢生嗣後無契之人赴善後局呈明由保甲局委員詢問明
確令其具結承領給予雙聯執照暫行管業兩年以內不准
轉典轉售如承領之後另有真業主出來呈明確據卽將在
前具結冒領之人枷號兩月充軍四千里嚴懲冒認者所以
保全真業主也

一金陵克復一年之久原屋主尙多未歸而本籍客籍之人進

屋寄居者正復不少此後如真屋主歸來赴善後局呈明派保甲局委員赴屋履勘分別開導或租或讓自應商量辦理各存恕道毋啟訟端切屬切屬

勦擒告示

爲剴切曉諭事照得皖豫江境昔年逼於擒擾民不聊生經地方官諭築圩寨防賊奔突旣爲爾民各保身家得安耕獲之利兼期堅壁清野漸收滅賊之效本大臣在江南時久聞各路圩練遇有寇警登陴固守賊卽無所擄掠其中勇敢之士復能抄賊尾股邀賊邊馬屢著戰功實堪嘉尙查擒逆老巢前在永亳蒙宥之間被擾最苦之圩惟此數州縣或被賊威脅逼迫相隨或被賊襲踞慘遭裹掠或不甘從賊而爲賊殺或被裹出竄而又爲兵殺困迫可憫情形莫此爲甚上年親王僧督兵入皖殲斬逆首張落刑等餘匪遠颺各圩民始得脫離水火漸謀

復業乃本年四月

賢王星隕曹州賊燄轉張現在大股匪徒

竄入永亳蒙宿一帶意在逼脅各圩以爲黨夥計殊狡譎聞此
次賊過永宿各圩拒守多不從匪足徵忠義奮發志切同仇本
大臣奉命督師赴徐州一帶勦辦擒逆議戰則責成官軍議
守仍需整理圩練爲此出示曉諭皖豫江境各圩練董知悉仰
各該圩練董隨時前來徐州本大臣親詢各路情形並面諭修
圩挖濠防守各事宜有能憑圩擊賊或誘擒逆首者定卽立予
優獎卽有被賊闖入或被賊逼從之圩官軍到日但能殺賊自
效赴本大臣軍營投首者悉予自新不加究問如敢與賊勾通
意懷觀望官軍至則從官擒匪至又從匪者大軍所至定卽悉

力勦除玉石俱焚追悔何及諒爾民守圩禦賊積時已久應各
知所趨向也各宜懍遵毋違特示

勦擒告示四條

爲曉諭事照得本部堂恭奉 簡命勦辦江蘇安徽山東河南等省擒匪擬於徐州臨淮濟甯周家口等處設立重兵以爲戰又令鄉村設立圩寨以爲守四路皆有重兵則無此勦彼竄之虞各縣皆有圩寨則無擄人擄糧之患所有應行事宜合亟出示曉諭俾遠近共見共聞開列四條於左

一堅壁清野 擒匪擾亂多年凡蘇皖齊豫當衝之縣人人皆知修築圩寨自相保衛但恐歲久人貧漸漸懈惰今宜大加整頓牆子要高濠溝要深此堅壁也人丁牲畜米糧柴草一搬入圩內賊來全無可擄此清野也如賊匪圍攻圩寨本

部堂立即派兵救援近則三日五日遠則十日半月必可趕到決不食言如不能堅守半月是該圩之過如半月而救兵不到即是本部堂之過爾等操練壯丁自保身家本部堂決不調圩練助勦他處亦不派圩董支應雜差但願爾等困苦餘生稍享安靜之福

二分別良莠 論捻匪者皆言蒙城亳州最多宿州永城次之帶兵者痛恨蒙亳皆欲勦洗以絕禍根本部堂觀蒙亳之人性質甚直良民甚多倡首爲亂者不過數人甘心從逆者爲數亦少其餘有因貧而偶爾從捻者有被脅而不得不從者雖同得捻黨之名而罪有輕重之別應徹底清查一次分別

懲辦倡首爲亂者如任柱張總愚牛洪李允諸人宜戮其身
屠其家并掘其墳墓甘心從逆者誅其身而不坐其家其因
貧偶從及被脅從捻者一概赦宥免死委員督同圩長挨戶
清查每圩各造二冊倡首爲亂及甘心從逆者爲莠民冊全
未從匪者爲良民冊偶從與脅從者爲自新良民亦編入良
民冊內入莠冊者在外則到處追勦在籍則擒拏正法入良
冊者五家具保結於圩長有事則五家連坐圩長具保結於
州縣有事則圩長連坐願我蒙毫曉事紳耆將莠民一一舉
報斬除數百家之匪類保全數十萬之善良免得一勦再勦
玉石俱焚通縣皆遭大劫悔之晚矣蒙毫宿永四屬限印委

各員於三箇月查畢此外有捻之州縣一體清查

三發給執照

各處圩中管事者稱曰圩主或曰寨主主字不

可妄稱今宜概改曰圩長每圩一人其幫辦者名曰副圩長
每圩或二三人多至四人而止凡充圩長者無論原有之圩
新立之圩由圩內大眾公舉一人具稟州縣州縣訪察確實
稟明本部堂正圩長由本部堂發給執照蓋用關防副圩長
由州縣發給諭單蓋用印信收執爲憑圩內有陽順官兵陰
從捻匪者圩長捆縛送官正法匪圩而誣扳良圩嚇逼鄰圩
者各圩公同稟究送匪最多者奏明請獎匿匪不報者將圩
長革去究懲平日不廢農務臨警守圩有功者奏明優獎圩

長苛斂財物不服人心者准圩眾公稟查明革換

四詢訪英賢

淮徐一路自古多英傑之士山左中州亦爲偉

人所萃方今兵革不息豈無奇材崛起無人禮之則棄於草澤飢寒賤隸之中有人求之則足爲國家干城腹心之用

本部堂久歷行閒求賢若渴如有救時之策出眾之技均准來營自行呈明察酌錄用卽不收用者亦必優給途費如有以鄰境之匪名單來告者賞銀三十兩如有以巨捻藏匿之蹤跡來告者賞銀四十兩如有薦舉賢才者除賞銀外酌予保獎藉一方之人材平一方之寇亂生民或有蘇息之日乎

禁止私押告示式

各屬辦法恐難畫一故定告示之式

爲奉文曉示禁止私押事照得本州辦理案件隨到隨審隨審隨結惟案內設有訊供未確或證佐未齊不能不管押候質無如差役舞弊或提到而匿不稟明或訊釋而私押索費且有以扭交指交爲名原告串差私自管押隨後具呈以爲欺懦之計種種弊竇相習成風今奉札嚴行查禁合亟牌示爲此示仰諸色人等知悉嗣後管押人證本州必於當時牌示註明日期及至開釋亦必立刻牌示俾眾周知如有示內無名及已登註開釋原差仍行私押者准該家屬人等喊稟以憑嚴究特示

計開

收押項下

按名登註某月某日因某案收押

開除項下

按名登註某月某日或訊釋或交保或押後收禁等項逐

一開明

右用橫牌寬約四尺高約一尺二三寸與諸牌不同懸於頭門前五六行寫告示可以累月不換後三尺餘寫姓名有新收者新釋者立即更換

保守平安歌三首

咸豐二年在湖南湘鄉本籍作

第一莫逃走

眾人謠言雖滿口我境切莫亂逃走我境僻處萬山中四方大
路皆不通我走天下一大半惟有此處可避亂走盡九州并四
海惟有此處最自在別處紛紛多擾動此處卻是桃源洞若嫌
此地不安靜別處更難逃性命只怕你們太膽小一聞謠言便
慌了一人倉忙四山逃一家大小泣嗷嗷男子縱然逃得脫婦
女難免受煎熬壯丁縱然逃得脫老幼難免哭號咷文契縱然
帶著走錢財不能帶分毫衣服縱然帶著走豬牛難帶一根毛
走出門來無屋住躲在山中北風號夜無被鋪牀板凳日無鍋

餽切菜刀受盡辛苦破盡財其實賊匪并未來祇因謠言自驚
慌惹起土匪吵一場茶陵道州遭土匪皆因驚慌先走徙其餘
各縣逃走人多因謠言嚇斷魂我境大家要保全切記不可聽
謠言任憑謠言風浪起我們穩坐釣魚船一家安穩不喫驚十
家太平不躲兵一人當事不害怕百人心中有柄橛本鄉本土
總不離立定主意不改移地方公事齊心辦大家喫碗安樂飯

第二要齊心

我境本是安樂鄉只要齊心不可當一人不敵二人智一家不
及十家強你家有事我助你我家有事你來幫若是人人來幫
助扶起籬笆便是牆只怕私心各不同你向西來我向東富者

但願自己好貧者卻願大家窮富者很心不憐貧不肯周濟半毫分貧者居心更難說但願世界遭搶劫各懷私心說長短彼此有事不相管縱然親戚與本家也是丟開不管他這等風俗實不好城隍土地都煩惱萬一鄰境土匪來不分好歹一筆掃富者錢米被人搶貧者飯碗也難保我們如今定主意大家齊心共努力一家有事聞鑼聲家家向前作救兵你救我來我救你各種人情各還禮縱然平日有仇隙此時也要解開結縱然平日打官方此時也要和一場大家喫杯團圓酒都是親戚與朋友百家合成一條心千人合做一雙手貧家飢寒實可憐富家量力略周旋鄰境土匪不怕他惡龍難鬪地頭蛇箇箇齊心

約夥伴關帝廟前立誓願若有一人心不誠舉頭三尺有神明

第三操武藝

要保一方好土地大家學些好武藝武藝果然學得精縱然有事不受驚石頭要打二十丈石灰罐子也一樣木板只要五寸寬箭箭要中靶子上石頭灰罐破得陣又鈿錨子一齊進靶子也立一塊板板上先鑿四箇眼眼內安箇小木毬戳在錨子尖上畱只要枝枝戳得準保守地方總安穩火器雖然是箇寶鳥銃卻要鑄得好火藥也要辦得真不然焯裂反傷人銃手若是不到家不如操演不用他惟有一種竹將軍裝得火藥大半斤三股麻繩緊緊纏一礮響動半邊天件件武藝皆無損石頭錨

子更要緊石頭不花一文錢。錘子要出一道圈。若是兩箇習得久。打盡天下無敵手。讀書子弟莫驕奢。學習武藝也保家。耕田人家圖安靜。學習武藝也不差。匠人若能學武藝。出門也有妨。身計商賈若能學武藝。店中大膽做生意。雇工若能武藝全。又有聲名又賺錢。白日無閒不能學。夜裏學習也快樂。臨到場上看大操。箇箇顯出手段高。各有義膽與忠肝。家家戶戶保平安。

水師得勝歌

并序

咸豐五年江西南康水營作

咸豐三年十一月余初造戰船辦水師楚中不知戰船爲何物
工匠亦無能爲役因思兩湖舊俗五日龍舟競渡最爲迅捷短
橈長槳如虵之足如鳥之飛此人力可以爲主者不盡關乎風
力水力也遂決計仿競渡之舟以爲戰船時守備成名標自長
沙來衡州始告余以廣東快蟹船式舢板船式同知楮汝航自
桂林來衡州告余以長龍船式於是鳩集衡州永州工匠又分
廠於湘潭共造快蟹四十號長龍四十號舢板八十號快蟹配
四十五人搖槳者廿八人艙八人長龍配廿四人搖槳者十六
人舢板配十四人搖槳者十人每船舵工一人頭工一

人礮手數人四年五月每船添立管駕者一人名曰哨官五年十月每船於眾槳手中置火彈手數人於是規模略備行之三年而未嘗更易惟舳板船小不能置鑪造飯不能容十餘人寢宿其中常另雇一民船爲坐船終非可久之道若長江大湖設立水師而用吾之法行之則舳板之坐船在所當變者也

余旣於癸丑冬創造戰船設立水師十營甲寅三月廿八日以五營擊湘潭之賊連獲大捷以五營擊靖港之賊軍士敗潰五月以後在長沙復修船隻重整規模六月克復岳州七月閏七月埽蕩岳鄂之間江面七百餘里搜勦黃蓋斧頭等湖八月克復武昌漢陽於是水師之規制略定將卒亦略諳水戰之法遂

製爲水師得勝歌令士卒歌誦口相習以熟冀嫻其大略而其
臨陣之神明變化則有不能及也歌曰

三軍聽我苦口說教你水戰真祕訣第一船上要潔淨全仗神
靈保性命早晚燒香掃灰塵敬奉江神與礮神第二灣船要稀
鬆時時防火又防風打仗也要去得稀切莫擁擠喫大虧第三
軍器要整齊船板莫沾半點泥牛皮圈子挂槳樁打溼水絮封
藥箱羣子包包要纏緊大子箇箇要合膛擡鎗磨得乾乾淨大
礮洗得潤潤光第四軍中要肅靜大喊大叫須嚴禁半夜驚營
莫急躁探聽賊情莫亂報切莫亂打鑼和鼓亦莫亂放鎗和礮
第五打仗不要慌老手心中有主張新手放礮總不準看來也

是打得蠢遠遠放礮不進當看來本事也平常若是好漢打得
進越近賊船越有勁第六水師要演操兼習長矛并短刀盪槳
要快舵要穩打礮總要習箇準斜斜排箇一字陣不慌不忙聽
號令出隊走得一線穿收隊排得一絡連慢的切莫丟在後快
的切莫走在前第七不可搶賊賊怕他來殺回馬槍又怕暗中
藏火藥未曾得財先受傷第八水師莫上岸止許一人當買辦
其餘箇箇要守船不可半步走河沿平時上岸打百板臨陣上
岸就要斬八條句句值千金你們牢牢記在心我待將官如兄
弟我待兵勇如子姪你們隨我也久長人人曉得我心腸願爾
將官莫懈怠願爾兵勇莫學壞未曾算去先算回未曾算勝先

算敗各人努力各謹慎自然萬事都平順仔細聽我得勝歌升
官發財笑呵呵

陸軍得勝歌

咸豐六年在江西南昌省城作

三軍聽我苦口說教你陸戰真祕訣第一紮營要端詳營盤選
箇好山岡不要低窪潮溼地不要一坦大平洋後有退步前有
進一半見面一半藏看定地方插標記插起竹竿牽繩牆繩子
圍出三道圈內圈略窄外圈寬六尺牆腳八尺壕壕要築緊牆
要牢正牆高要七尺滿子牆只有一半高爛泥碎石不堅固雨
後倒塌一缸糟一營只開兩道門門外驅逐閒雜人周圍挖些
好茅廁免得熱天臭氣薰三里以外把箇卡日日守卡夜夜巡
第二打仗要細思出隊要分三大支中間一支且紮住左右兩
支先出去另把一支打接應再要一支埋伏定隊伍排在山坡

上營官四處好瞭望看他那邊是來路看他那邊是去向看他
那路有伏兵看他那路有強將那處來的真賊頭那邊做的假
模樣件件看清件件說說得人人都膽壯他吶喊來我不喊他
放鎗來我不放他若撲來我不動待他疲了再接仗起手要陰
後要陽出隊要弱收隊強初交手時如老鼠越打越強如老虎
打散賊匪四山逃追賊專從兩邊抄逢屋逢山搜埋伏隊伍切
莫亂分毫第三行路要分班各營隊伍莫亂參四六隊伍走前
後鍋帳擔子走中間不許爭先太擁擠不許落後太孤單選箇
探馬向前探要選明白真好漢每日先走二十里一步一步仔
細看遇著樹林探村莊遇著河水探橋梁遇著岔路探埋伏左

邊右邊都要防遇著賊匪來迎敵飛馬回報不要忙看定地勢
并虛實遲報一刻也不妨前有探馬走前站後有將官押尾幫
過了尾幫落後邊插他耳箭打一千第四規矩要肅靜有禮有
法有號令哨官管兵莫太寬營官也要嚴哨官出營歸營要告
假朔日望日要請安若有公事穿衣服大家出來站箇班營門
擺設杖和枷閒人進來便鎖拏不許吸煙并賭博不許高聲大
喧譁姦淫擄掠定要斬巡更傳令都要查起更各哨就安排傳
齊夫勇點名來營官三夜點一次哨官每夜點一回任憑客到
文書到營門一閉總不開衣服裝扮要料哨莫穿紅綠惹人笑
哨官不許穿長衣兵勇不許穿軟料腳上草鞋緊緊穿身上腰

帶緊緊纏頭上包巾緊緊紮英雄樣子都齊全第五軍器要整
齊各人製件好東西雜木杆子潤潤圓又光又硬又發縣常常
在手摸得久越摸越熟越值錢錨頭只要六寸長要出楊家梨
花鎗大刀要輕腰刀重快如閃電白如霜鎗礮鑽洗要乾淨鉛
子箇箇要合膛生漆皮桶盛火藥勤翻勤曬見太陽鋤鋤鏟子
要粗大斧頭要嵌三分鋼火毬都要親手製六分淨硝四分磺
旂幟三月換一次紅的印心白的鑲統領八面營官四隊長一
面哨官雙樹樹搖出如龍虎對對走出似鴛鴦第六兵勇要演
操清清靜靜莫號嘈早習大刀並錨子晚習扒牆並跳壕壕溝
要跳八尺寬牆子要扒七尺高樹箇靶子十丈遠火毬石子手

中拋閒時尋箇寬地方又演跑隊又演鎗鳥鎗手勁習箇穩擡
鎗眼力習箇準灌起鉛子習打靶翻山過水習跑馬事事操習
事事精百戰百勝有名聲者箇六條句句好人人唱熟是祕寶
兵勇甘苦我盡知生怕你們喫了虧仔細唱我得勝歌保你福
多又壽多

一、

愛民歌

咸豐八年在江西建昌大營作

三軍箇箇仔細聽行軍先要愛百姓賊匪害了百姓們全靠官
兵來救人百姓被賊喫了苦全靠官兵來作主第一紮營不要
懶莫走人家取門板莫拆民房搬磚石莫踹禾苗壞田產莫打
民間鴨和雞莫借民間鍋和碗莫派民夫來挖壕莫到民家去
打館築牆莫攔街前路砍柴莫砍墳上樹挑水莫挑有魚塘凡
事都要讓一步第二行路要端詳夜夜總要支帳房莫進城市
占鋪店莫向鄉閒借村莊人有小事莫喧譁人不躲路莫擠他
無錢莫扯道邊菜無錢莫喫便宜茶更有一句緊要書切莫擄
人當長夫一人被擄挑擔去一家嘯哭不安居娘哭子來眼也

腫妻哭夫來淚也枯從中地保又譌錢分派各團并各都有夫
派夫無派錢牽了騾馬又牽豬雞飛狗走都嚇倒塘裏嚇死幾
條魚第三號令要嚴明兵勇不許亂出營走出營來就學壞總
是百姓來受害或走大家譌錢文或走小家調婦人邀些地痞
做夥計買些燒酒同喝醉逢著百姓就要打遇著店家就發氣
可憐百姓打出血喫了大虧不敢說生怕老將不自在還要出
錢去陪罪要得百姓稍安靜先要兵勇聽號令陸軍不許亂出
營水軍不許岸上行在家皆是做良民出來當兵也是人官兵
賊匪本不同官兵是人賊是禽官兵不搶賊匪搶官兵不淫賊
匪淫若是官兵也淫搶便同賊匪一條心官兵與賊不分明到

處傳出醜聲名百姓聽得就心酸上司聽得皺眉尖上司不肖
發糧餉百姓不肯賣米鹽愛民之軍處處喜擾民之軍處處嫌
我的軍士跟我早多年在外名聲好如今百姓更窮困願我軍
士聽教訓軍士與民如一家千記不可欺負他日日熟唱愛民
歌天和地和又人和

解散歌

咸豐十一年安徽祁門大營作

莫打鼓來莫打鑼聽我唱箇解散歌如今賊多有緣故大半都
是擄進去擄了良民當長毛箇箇心中都想逃官兵若殺脅從
人可憐冤枉無處伸良民一朝被賊擄喫盡千辛并萬苦初擄
進去就挑擔板子打得皮肉爛又要煮飯又搬柴上無衣服下
無鞋看看頭髮一寸長就要逼他上戰場初上戰場眼哭腫又
羞又恨又懵懂向前又怕官兵砍退後又怕長毛斬一年兩載
髮更長從此不敢回家鄉一封家信無處寄背地落淚想爺娘
被擄太久家太貧兒子餓死妻嫁人半夜偷逃想回家層層賊
卡有盤查又怕官軍盤得緊跪求饒命也不准又怕團勇來訛

錢搶去衣服并盤纏種種苦情說不完說起閻王也心酸我今到處貼告示凡是脅從皆免死第一不殺老和少登時釋放給護照第二不殺老長髮一尺二尺皆遣發第三不殺面刺字勸他用藥洗幾次第四不殺打過仗丟了軍器便釋放第五不殺做僞官被脅受職也可寬第六不殺舊官兵被賊圍捉也原情第七不殺賊探子也有愚民被驅使第八不殺網送人也防鄉團網難民人人不殺都膽壯各各逃生尋去向賊要聚來我要散賊要擄來我要放每人給張免死牌保你干妥又萬當往年在家犯過罪從今再不算前帳不許縣官問陳案不許仇人告舊狀一家骨肉再團圍九重皇恩真浩蕩一言普告州和縣再

告兵勇與團練若遇脅從難民歸莫搶銀錢莫剝衣

格言四幅書贈李芋仙

時咸豐十一年在東流大營

身到心到眼到手到口到

身到者如作吏則親驗命盜案親查鄉里治軍則親巡營壘
親冒矢石是也心到者凡事苦心剖晰大條理小條理始條
理終條理先要擘得開後要括得攏是也眼到者著意看人
認真看公牘是也手到者於人之短長事之關鍵隨筆寫記
以備遺忘是也口到者於使人事警眾之辭既有公文又不
憚再三苦口丁寧是也余近與寮友論治事之法錄貽芋
仙共證之

讀古書以訓詁爲本作詩文以聲調爲本事親以得歡心爲本

養生以少惱怒爲本立身以不妄語爲本治家以不晏起爲本
居官以不要錢爲本行軍以不擾民爲本

右八者余庚申六月書於日記冊中用以自警厥後軍事無
利每於家書中錄此以誡子弟芋仙屬書居官格言因錄一
通此八者後四語尤爲吃緊或出或處不可離也

以才自足以能自矜則爲小人所忌亦爲君子所薄

老莊之旨以此爲最要故再三言之而不已南榮越羸糧至
老子之所老子曰子何與人偕來之眾也國藩每讀之不覺
失笑以仲尼之溫恭儉讓常以周公才美驕吝爲戒而老子
猶曰去汝之躬矜與容智雖非事實而老氏之所惡於儒術

者舉可知已莊生尤數數言此吾最愛徐無鬼篇中語曰學一先生之言則暖暖姝姝而私自悅也又曰以賢臨人未有人者也以賢下人未有不得人者也

古之善爲詩古文者其工夫皆在詩古文之外若尋行數墨以求之索之愈迫則去之愈遠矣

余好讀歐陽公送徐無黨南歸序乃知古之賢者其志趣殊不願以文人自命東坡讀少陵許身稷契及舜舉十六相等句以謂此老胸中大有事在大抵經綸雷雨關乎遭際非人力所能強至於襟期澹泊遺外聲利則學者人人可勉也

書贈弟六則

清 記曰清明在躬吾人身心之間須有一種清氣使子弟飲
其和鄉黨薰其德庶幾積善可以致祥飲酒太多則氣必昏
濁說話太多則神必躁擾弟於此二弊皆不能免欲葆清氣
首貴飲酒有節次貴說話不苟

儉 凡多欲者不能儉好動者不能儉多欲如好衣好食好聲
色好書畫古玩之類皆可浪費破家弟向無癖嗜之好而頗
有好動之弊今日思作某事明日思訪某客所費日增而不
覺此後講求儉約首戒好動不輕出門不輕舉事不特不作
無益之事卽修理橋梁道路寺觀善堂亦不可輕作舉動多

則私費大矣其次則僕從宜少所謂食之者寡也其次則送情宜減所謂用之者舒也否則今日不儉異日必多欠債既負累於親友亦貽累於子孫

明

三達德之首曰智智卽明也古來豪傑動稱英雄英卽明也明有二端人見其近吾見其遠曰高明人見其粗吾見其細曰精明高明者譬如室中所見有限登樓則所見遠矣登山則所見更遠矣精明者譬如至微之物以顯微鏡照之則加大一倍十倍百倍矣又如粗糙之米再舂則粗糠全去三舂四舂則精白絕倫矣高明由於天分精明由於學問吾兄弟忝居大家天分均不甚高明專賴學問以求精明好問若

買顯微之鏡好學若春上熟之米總須心中極明而後口中
可斷能明而斷謂之英斷不明而斷謂之武斷武斷自己之
事爲害猶淺武斷他人之事招怨實深惟謙退而不肯輕斷
最足養福

慎 古人曰欽曰敬曰謙曰謹曰虔恭曰祇懼皆慎字之義也
慎者有所畏憚之謂也居心不循天理則畏天怒作事不順
人情則畏人言少賤則畏父師畏官長老年則畏後生之竊
議高位則畏僚屬之指摘凡人方寸有所畏憚則過必不大
鬼神必從而原之若嬉遊鬪牌等事而豪無忌憚壞鄰黨之
風氣作子孫之榜樣其所損者大矣

恕

聖門好言仁仁卽恕也曰富曰貴曰成曰榮曰譽曰順此

數者我之所喜人亦皆喜之曰貧曰賤曰敗曰辱曰毀曰逆
此數者我之所惡人亦皆惡之吾輩有聲勢之家一言可以
榮人一言可以辱人榮人則得名得利得光耀人尙未必感
我何也謂我有勢幫人不難也辱人則受刑受罰受苦惱人
必恨我次骨何也謂我倚勢欺人太甚也吾兄弟須從恕字
痛下工夫隨在皆設身以處地我要步步站得穩須知他人
也要站得穩所謂立也我要處處行得通須知他人也要行
得通所謂達也今日我處順境預想他日也有處逆境之時
今日我以盛氣凌人預想他日人亦以盛氣凌我之身或凌

我之子孫常以恕字自惕常畱餘地處人則荆棘少矣

靜

靜則生明動則多咎自然之理也家長好動子弟必紛紛

擾擾朝生一策暮設一計雖嚴禁之而不能止欲求一家之
安靜先求一身之清靜靜有二道一曰不入是非之場二曰
不入勢利之場鄉里之詞訟曲直於我何干我若強爲剖斷
始則賠酒飯後則惹怨恨官場之得失升沈於我何涉我若
稍爲干預小則招物議大則挂彈章不若一概不管可以斂
後輩之躁氣卽可保此身之清福

勸誡淺語十六條

勸誡州縣四條

上而道府下而佐雜以此類推

一曰治署內以端本

宅門以內曰上房曰官親曰幕友曰家丁頭門以內曰書辦曰差役此六項者皆署內之人也爲官者欲治此六項人須先自治其身凡銀錢一分一毫一出入無不可對人言之處則身邊之人不敢妄取而上房官親幕友家丁四者皆治矣凡文書案牘無一不躬親檢點則承辦之人不敢舞弊而書辦差役二者皆治矣

二曰明刑法以清訟

管子荀子文中子之書皆以嚴刑爲是以赦宥爲非子產治鄭諸葛治蜀王猛治秦皆用嚴刑以致乂安爲州縣者苟盡心於民事是非不得不剖辨讞結不得不迅速旣求迅結不得不刑惡人以伸善人之氣非虐也除莠所以愛苗也懲惡所以安良也若一案到署不訊不結不分是非不用刑法名爲寬和實糊塗耳懶惰耳縱姦惡以害善良耳

三曰重農事以厚生

軍興以來士與工商生計或未盡絕惟農夫則無一人不苦無一處不苦農夫受苦太久則必荒田不耕軍無糧則必擾民民無糧則必從賊賊無糧則必變流賊而大亂無了日矣故今日

之州縣以重農爲第一要務病商之錢可取病農之錢不可取薄斂以紓其力減役以安其身無牛之家設法購買有水之田設法疏通要使農夫稍有生聚之樂庶不至逃徙一空

四曰崇儉樸以養廉

近日州縣廉俸入款皆無著落而出款仍未盡裁是以艱窘異常計惟有節用之一法尙可公私兩全節用之道莫先於人少官親少則無需索酬應之繁幕友家丁少則減薪工雜支之費官廚少一雙之箸民間寬一分之力此外衣服飲食事事儉約聲色洋煙一一禁絕不獻上司不肥家產用之於己者有節則取之於民者有制矣

勸誡營官四條

新著卷二
上而統領下而哨弁以此類推

一曰禁騷擾以安民

所惡乎賊匪者以其淫擄焚殺擾民害民也所貴乎官兵者以其救民安民也若官兵擾害百姓則與賊匪無殊矣故帶兵之道以禁止騷擾爲第一義百姓最怕者惟強擄民夫強佔民房二事擄夫則行者辛苦居者愁思佔房則器物毀壞家口流離爲營官者先禁此二事更於淫搶壓買等事一一禁止則造福無窮矣

二曰戒煙賭以儆惰

戰守乃極勞苦之事全仗身體強壯精神完足方能敬慎不敗

洋煙賭博二者既費銀錢又耗精神不能起早不能守夜斷無不誤軍事之理軍事最喜朝氣最忌暮氣惰則皆暮氣也洋煙癮發之人涕洟交流遍身癱軟賭博勞夜之人神魂顛倒竟日癡迷全是一種暮氣久驕而不敗者容或有之久惰則立見敗亡矣故欲保軍士常新之氣必自戒煙賭始

三曰勤訓練以禦寇

訓有二端一曰訓營規二曰訓家規練有二端一曰練技藝二曰練陣法點名演操巡更放哨此將領教兵勇之營規也禁嫖賭戒游惰慎語言敬尊長此父兄教子弟之家規也爲營官者待兵勇如子弟使人人學好個個成名則眾勇感之矣練技藝

者刀矛能保身能刺人鎗礮能命中能及遠練陣法者進則同
進站則同站登山不亂越水不雜總不外一熟字技藝極熟則
一人可敵數十人陣法極熟則千萬人可使如一人

四曰尙廉儉以服眾

兵勇心目之中專從銀錢上著意如營官於銀錢不苟則兵勇
畏而且服若銀錢苟且則兵勇心中不服口中譏議不特扣減
口糧缺額截曠而後議之也卽營官好多用親戚本家好應酬
上司朋友用營中之公錢謀一身之私事也算虛糜餉銀也
難免兵勇譏議欲服軍心必先尙廉介欲求廉介必先崇儉樸
不妄花一錢則一身廉不私用一人則一營廉不獨兵勇畏服

亦且鬼神欽伏矣

勸誠委員四條

向無額缺現有職事之員皆歸此類

一曰習勤勞以盡職

觀於田夫農父終歲勤勞而少疾病則知勞者所以養身也觀於舜禹周公終身憂勞而享壽考則知勞者所以養心也大抵勤則難朽逸則易壞凡物皆然勤之道有五一日身勤險遠之路身往驗之艱苦之境身親嘗之二日眼勤遇一人必詳細察看接一文必反覆審閱三日手勤易棄之物隨手收拾易忘之事隨筆記載四日口勤待同僚則互相規勸待下屬則再三訓導五曰心勤精誠所至金石亦開苦思所積鬼神亦通五者皆

到無不盡之職矣

二曰崇儉約以養廉

昔年州縣佐雜在省當差并無薪水銀兩今則月支數十金而猶嫌其少昔年舉貢生員在外坐館不過每月數金今則增至一兩倍而猶嫌其少此所謂不知足也欲學廉介必先知足觀於各處難民徧地餓孳則吾輩之安居衣食已屬至幸尙何奢望哉尙敢暴殄哉不特當廉於取利并當廉於取名毋貪保舉毋好虛譽事事知足人人守約則氣運可挽回矣

三曰勤學問以廣才

今世萬事紛紜要之不外四端曰軍事曰吏事曰餉事曰文事

而已凡來此者於此四端之中各宜精習一事習軍事則講究戰攻防守地勢賊情等件習吏事則講究撫字催科聽訟勸農等件習餉事則講究丁漕釐捐開源節流等件習文事則講究奏疏條教公牘書函等件講究之法不外學問二字學於古則多看書籍學於今則多覓榜樣問於當局則知其甘苦問於旁觀則知其效驗勤習不已才自廣而不覺矣

四曰戒傲惰以正俗

余在軍日久不識術數占驗而頗能預知敗徵太約將士有驕傲氣者必敗有怠惰氣者必敗不獨將士然也凡委員有傲氣者亦必僨事有惰氣者亦必獲咎傲惰之所起者微而積久遂

成風俗一人自是將舉國予聖自雄矣一人晏起將舉國俾晝
作夜矣今與諸君約多做實事少說大話有勞不避有功不矜
人人如此存心則勛業自此出風俗自此正人材亦自此盛矣

勸誡紳士四條

本省鄉紳外省客游之士皆歸此類

一曰保愚懦以庇鄉

軍興以來各縣皆有紳局或籌辦團練或支應官軍大抵皆斂
錢以集事或酌量捐資或按畝派費名爲均勻分派實則高下
參差在局之紳耆少出不在局之愚懦多出與局紳有聲氣者
少出與局紳無瓜葛者多出與局紳有夙怨者不惟勒派多出
而且嚴催凌辱是亦未嘗不害民也欲選紳士以能保本鄉愚

懦者爲上等能保愚懦雖僞職亦尙可恕凌虐愚懦雖巨紳亦屬可誅

二曰崇廉讓以奉公

凡有公局卽有經管銀錢之權又有勞績保舉之望同列之人或爭利權而相怨或爭保舉而相軋此不廉也始則求縣官之一札以爲榮繼則大柄下移毫無忌憚衙門食用之需仰給紳士之手擅作威福藐視官長此不遜也今特申戒各屬紳士以敬畏官長爲第一義財利之權歸之於官賞罰之柄操之自上卽同列眾紳亦互相推讓不爭權勢紳士能潔已而奉公則庶民皆尊君而親上矣

三曰禁大言以務實

以諸葛之智勇不能克魏之一城以范韓之經綸不能制夏之一隅是知兵事之成敗利鈍皆天也非人之所能爲也近年書生侈口談兵動輒曰克城若干拓地若干此大言也孔子曰攻其惡無攻人之惡近年書生多好攻人之短輕詆古賢苛責時彥此亦大言也好談兵事者其閱歷必淺好攻人短者其自修必疏今與諸君子約爲務實之學請自禁大言始欲禁大言請自不輕論兵始自不道人短始

四曰擴才識以待用

天下無現成之人才亦無生知之卓識大抵皆由勉強磨鍊而

出耳淮南子曰功可強成名可強立董子曰強勉學問則聞見博強勉行道則德日起中庸所謂人一己百人十已千卽勉強工夫也今士人皆思見用於世而乏用世之具誠能考信於載籍問途於已經苦思以求其通躬行以試其效勉之又勉則識可漸進才亦漸充才識足以濟世何患世莫已知哉

以上十六條分之則每一等人各守四條合之則凡諸色人皆可參觀聖賢之格言甚多難以備述朝廷之律例甚密亦難周知只此淺近之語科條在此黜陟亦在此願我同人共勉焉咸豐十一年九月曾國藩識

聞人共論其德下

一曰本國風俗只由

人教其德風俗

由土十六劫安

以漸而下亦漸

詳則致效曰所

上大夫令士人

言德德行德

曰百教南子曰

勸學篇示直隸士子

人才隨土風爲轉移信乎曰是不盡然然大較莫能外也前史稱燕趙慷慨悲歌敢於急人之難蓋有豪俠之風余觀直隸先正若楊忠愍趙忠毅鹿忠節孫徵君諸賢其後所詣各殊其初皆於豪俠爲近卽今日士林亦多剛而不搖質而好義猶有豪俠之遺才質本於土風殆不誣與豪俠之質可與入聖人之道者約有數端俠者薄視財利棄萬金而不眇而聖賢則富貴不處貧賤不去痛惡夫墦間之食龍斷之登雖精粗不同而輕財好義之迹則略近矣俠者忘己濟物不惜苦志脫人於厄而聖賢以博濟爲懷鄒魯之汲汲皇皇與夫禹之猶已溺稷之猶已

飢伊尹之猶已推之溝中曾無少異彼其能力救窮交者卽其可以進援天下者也俠者輕死重氣聖賢罕言及此然孔曰成仁孟曰取義堅確不移之操亦未嘗不與之相類昔人譏太史公好稱任俠以余觀此數者乃不悖於聖賢之道然則豪俠之徒未可深貶而直隸之士其爲學當較易於他省烏可以不致力乎哉致力如何爲學之術有四曰義理曰考據曰辭章曰經濟義理者在孔門爲德行之科今世目爲宋學者也考據者在孔門爲文學之科今世目爲漢學者也辭章者在孔門爲言語之科從古藝文及今世制義詩賦皆是也經濟者在孔門爲政事之科前代典禮政書及當世掌故皆是也人之才智上哲少

而中下多有生又不過數十寒暑勢不能求此四術徧觀而盡取之是以君子貴慎其所擇而先其所急擇其切於吾身心不可造次離者則莫急於義理之學凡人身所自具者有耳目口體心思日接於吾前者有父子兄弟夫婦稍遠者有君臣有朋友爲義理之學者蓋將使耳目口體心思各敬其職而五倫各盡其分又將推以及物使凡民皆有以善其身而無憾於倫紀夫使舉世皆無憾於倫紀雖唐虞之盛有不能逮苟通義理之學而經濟該乎其中矣程朱諸子遺書具在曷嘗舍末而言本遺新民而專事明德觀其雅言推闡反覆而不厭者大抵不外立志以植基居敬以養德窮理以致知克己以力行成物以致

用義理與經濟初無兩術之可分特其施功之序詳於體而略於用耳今與直隸多士約以義理之學爲先以立志爲本取鄉先達楊趙鹿孫數君子者爲之表彼能艱苦困餓堅忍以成業而吾何爲不能彼能置窮通榮辱禍福死生於度外而吾何爲不能彼能以功績稱當時教澤牖後世而吾何爲不能洗除舊日曖昧卑污之見矯然直趨廣大光明之域視人世之浮榮微利若蠅蚋之觸於目而不畱不憂所如不耦而憂節概之少貶不恥凍餒在室而恥德不被於生民志之所嚮金石爲開誰能禦之志既定矣然後取程朱所謂居敬窮理力行成物云者精研而實體之然後求先儒所謂考據者使吾之所見證諸古制

而不謬然後求所謂辭章者使吾之所獲達諸筆劄而不差擇一術以堅持而他術固未敢竟廢也其或多士之中質性所近師友所漸有偏於考據之學有偏於辭章之學亦不必遽易前轍卽二途皆可入聖人之道其文經史百家其業學問思辨其事始於修身終於濟世百川異派何必同哉同達於海而已矣若夫風氣無常隨人事而變遷有一二人好學則數輩皆思力追先哲有一二人好仁則數輩皆思康濟斯民倡者啟其緒和者衍其波倡者可傳諸同志和者又可檀諸無窮倡者如有本之泉放乎川瀆和者如支河溝澮交匯旁流先覺後覺互相勸誘譬之大水小水互相灌注以直隸之士風誠得有志者導夫

先路不過數年必有體用兼備之才彬蔚而四出泉湧而雲興
余忝官斯土自媿學無本原不足儀型多士嘉此邦有剛方質
實之資鄉賢多堅苦卓絕之行粗述舊聞以勗羣士亦冀通才
碩彥告我昌言上下交相勸勉仰希古昔與人爲善取人爲善
之軌於化民成俗之道或不無小補云

直隸清訟事宜十條

第一條通省大小衙門公文宜速

凡公事遲延通弊有二曰支曰展支者推諉他人如院仰司司仰府府仰縣之類一經轉行卽算辦畢但求出門不求了事是也展者遲延時日如上月展至下月春季展至夏季愈宕則愈鬆擔遲不擔錯者是也各省均難免此習氣而直隸則似更甚藩司照轉督院之文有數月未轉行者總局奉飭核議之件有終歲不議詳者上控之案飭府先查大概往往經年不報飭縣錄案詳復亦或經年不復催提錢糧則曰另文批解催提人證則曰傳到卽解宕過數次上司亦遂置之不問上下相容疲玩

已甚前此猶有軍務可諉本部堂當肅清之後不得不力挽積習與諸君子舍舊圖新以公事之勤惰覘同官之賢否除尋常文牘外如催解銀解犯之類均須酌定限期分記功過其四種月報之四柱冊限期送省懸榜官廳至飭道府先查大概之事飭州縣錄案詳復之件亦將限期懸牌官廳違者記過小過積至六次大過積至三次者撤委示懲司道有積壓之文本部堂必面加詰責督署有稽延之牘亦望僚友立進箴規通省上下皆以勤字爲本自有一種旭日初升氣象雖不專爲獄訟而清訟之道必自此始

第二條保定府發審局宜首先整頓

保定發審局雖爲首府之專司而實總督衙門之分局凡京控省控奏交咨交各案總督獨挈其綱而兩司與首府分任其責若不能詳慎速結則積案日多弊端百出聞京控發交到局委員往提人證間有得錢賣放之弊行賄受託則以患病外出等詞捏稟搪塞此一弊也案證提到省城分別保押聽候審辦有發交清苑取保者縣役任意訛索有發交轅門取保者府役與門丁任意訛索有取店保者店家居奇勒措擇肥而噬此又一弊也每過堂時必有差役承帶案證而承帶之差往往五日一換換差一次講費一次誅求無厭此又一弊也斯三者全賴首府認真防範督院及臬司隨時稽查提犯則刪除閒人專提要

證愈少愈好札飭本地方官依限解到不得輕率委員前往取保則再三訪察嚴禁訛索承帶則一案一差始終不准更換吾輩稍盡一分之心訟者少受一分之苦及發交局員審訊每案只派一員承審一員副之凡京控巨案初到時正副二員將卷宗細看過堂一二次尋出端倪開一節略其末卽稍判曲直五日之內臬司帶同首府及正副承審官上院本部堂與之商論一番名曰議獄其應由藩司主稿者則兩司帶同首府局員上院議獄議畢再行審訊緊要工夫全在議獄一次及初訊一二堂而案之是非已明矣未過堂之先不妨詳慎訪察既過堂則須求速了愈速則真情易露愈久則幻態彌多其業已淹滯者

尤須設法催辦上司以嚴札催之首府以婉言催之局員以仁心自催之另立限期分記功過訊結之後取保者飭令速歸管押者立予釋放卽監禁者亦時加檢點惟恐痠斃首府之滯獄一清通省之風俗立變造福造孽只在吾人寸心一轉移閒耳

第三條州縣須躬親六事不得盡信幕友丁書

牧令爲自古要官百姓之所託命非才德俱優難言稱職然天下安得許多龔黃卓魯萃於一方吾輩與人爲善懸格不可太高但求中材可勉者苟能以勤字爲本事事必躬必親便可造到第一等循吏直隸怠玩之習相沿已久每逢三八告期或委典史收狀或由承發房將呈詞送交門丁門丁積壓數日送交

幕友幕友擬批掛榜而本官尙不知呈中所告何事至判閱稿
票時任聽丁書主政按照呈內姓名全數差傳不敢刪減一名
甚至經年累月未嘗坐堂訊問兩造破家蕩產求息訟而不能
此小民所以困窮案牘所以叢積也今與諸君約有六事宜躬
親者放告之期必須親自收狀能斷者立予斷結不能斷者交
幕擬批必須親自細核分別准駁准理者差票傳人必須親自
刪減命盜案件以初起供招爲重必須親自勘驗愈速愈妙承
審限期何日解勘何日詳結必須親自計算監禁管押之犯常
往看視每日牌示頭門每月冊報上司必須親自經理六者皆
能躬親則聽訟之道失者寡矣如其怠惰偷安不肖躬親者記

過示懲如其識字太少不能躬親者嚴參不貸

第四條禁止濫傳濫押頭門懸牌示眾

凡小民初涉訟時原被告彼此忿爭任意混寫多人其中妄扳者居多且有差役勾串牽入呈內者票上之傳人愈多書差之索費愈甚名曰叫點所謂堂上一點硃民間萬點血也嗣後自理詞訟只准一原一被一干證或證至二三人爲止不准多傳傳到人證非命盜大案不准輕於管押只許當堂取保候訊萬不得已而羈押則須隨時親到班館查訪有無凌虐私押等弊仍製造大粉牌一面懸掛頭門之外將在押人姓名逐一開載並註明某月某日因某案管押書明牌上俾眾周知倘書差舞

弊私押准家屬喊稟嚴究本部堂常常派人密查如有並未懸牌或牌上人數與在押之數不符與月報之數不符者記過重懲

第五條禁止書差索費

凡一呈詞到案如有交涉富民及巨商者則差役勾串門丁買此案差票又或丁書納賄簽粘原差之名于票尾朦官標判又或家丁求明本官指名簽差此種弊竇無處無之又或原差串通告狀之人伺該差值日方來喊控以爲明比訛索地步此卽江南所謂坐差也差役持票到門引類呼朋叫囂徵逐婦女出避雞犬不安本家之搜索旣空親族或因而受累及審訊時有

坐堂之費將結時有了衙門之費兩造議和者又有和息呈詞之費一字到官百端需索瘡痍赤子其何以堪自今以後各屬當除以上積弊凡簽差皆擇謹愿者分路酌派不准丁書粘簽指請一切規費酌量核減視民家有差騷擾如吾家有差未退視民家有訟糾纏如吾家有訟未結官長設身處地則民間受福無窮此在良有司寸心自儆自修吾不能一一預懸記過之格然訪察得實亦必隨時嚴懲

第六條四種四柱冊按月呈報懸榜

直隸向來章程州縣按月呈報上司者約有五種一曰新舊各案已結未結開摺呈報二曰監禁之犯開摺呈報三曰管押之

犯開摺呈報四曰監管病斃者具稟呈報五曰竊賊未獲者具稟呈報每月報此五事立法可謂至密至善矣乃近來不報之縣甚多呈報之縣甚少卽或偶報一月又復閒斷數月以致無可稽查今欲清釐獄訟須將此四種章程認真行之本閣部堂定一格式首曰積案上月控者爲舊管本月控者爲新收審結者和息者注銷者爲開除未結者爲實在次曰監禁次曰管押皆分舊管新收開除實在爲四柱又次曰逸犯無論強盜竊賊土匪逃軍凶犯要證但係逃逸應緝者概名之曰逸犯分舊逸新逸已獲在逃爲四柱其逸犯名數未定者則添注曰又應緝者幾起每縣每月填寫格式一葉而四種朗然在目矣其每種

各開人名事宜清單仍照向例開寫但宜略不宜詳耳州縣於每月初一二三等日辦齊四柱冊四種由驛遞省其偏僻之縣自度驛遞難到者專差送省限十日內送齊院司查對數日釘成總冊存於三處官廳大眾閱看其未報者報而不實者立予記過其已報者視結案獲犯之遲速監禁管押之多少定該員之功過有過有功者另寫一榜懸於三處官廳此皆本省舊章前督劉公會申明之本閣部堂與諸寮友當力行之

第七條嚴治盜賊以弭隱患

近來盜案迭出搶劫頻仍勒緝嚴比之文書不絕而罕見破獲之犯初二三參之奏咨不絕而終無降調之官卽真正強盜斬

犯而再三勘轉狡供駁回亦非四五年不能正法爲從者更逍
遙法外毫無畏憚是以盜風日盛邦畿重地萬方輻湊而行旅
皆有戒心從前梟匪教匪捻黨降眾餘氛未殄一夫煽動羣盜
嘯聚此直隸之隱患也欲弭大患先除小盜州縣一遇盜案無
不責成捕役捕役之能幹者強半通賊本不願於破案一經破
獲之後解府解省往返羈畱費用半出自捕役捕役應得之工
食本官久捐不發解案之費資該役無從措辦此捕快所以藉
豢賊爲生路視獲賊爲畏途也嗣後各州縣皆宜厚養捕役工
食之外另給月餉恣其所爲譬如良將厚養死士不問干日之
過但責一朝之效及至捕案之時購線募人等費官爲給發重

懸賞格少者數十金多者每名百金或數百金捕而不獲則又酷刑嚴比血濺肉飛大利在前峻法在後而捕役之不盡力者寡矣既養捕役以治其標又擇團長以治其本選明幹者數人立爲團長優加禮貌酌給薪資令之幫辦捕務約束鄉鄰首告者有賞隱匿者連坐禁賭場以清其藪拏窩家以絕其蹤專講捕盜之實政不尙會緝之虛文既獲之後分別兩種辦法一種贓少而情輕者仍照舊例招解勘轉一種贓多而情重者稟請本部堂可否照軍法從事本部堂審擇要犯批令先行解省委審明確立正軍法劇盜之首速梟羣賊之膽自破而梟教擒匪之餘黨或亦可弭患無形除具奏外仰各屬實力遵行其平日

不能治本治標臨時不能重賞嚴比者記過撤參其果能認真緝捕者懸賞之銀每名百金可令獲犯之人徑來督院領賞卽難解之犯本部堂亦可派兵迎護事事相諒相助要不使屬員有掣肘處耳

第八條訟案久懸不結核明註銷

鄉曲愚民每因一言參商致起訟端迨事過氣平或經親友勸解又復怨釋悔生彼此情甘罷訟而衙門索和息錢文難以措辦因而避匿遷延久不到案此案懸不結之一端也又有刁民憑空砌詞涉訟或挾仇或漁利造作影響無據之言誣告多人但求准狀不求審理遞呈之後永遠不敢到案此案懸不結之

又一端也直隸天津河間此等惡風尤甚若任其經年懸宕則被告干證受累無窮每逢新年開印或值新官到任一概換票一次恐嚇傳提徒爲書差門丁謀利之券實可深恨查例載各衙門告言人罪一經批准卽令原告投審若不赴審輒復脫逃及並無疾病事故兩月不到案聽審者卽將被誣及誣證釋放所告之事不與審理拏獲原告專治以誣告之罪等語嗣後有日久未結各案原告兩月未經呈催卽照原告兩月無故不投審例將案註銷並將差票查繳以清積牘一面將註銷緣由稟聞一面彙入月報冊列於積案開除項下報查

第九條分別阜白嚴辦誣告訟棍

直隸民情樸厚剛直好善之風甲於天下而健訟逞刁者亦復不少或貧民挾仇訛詐砌詞上控希圖拖累富民或莠民聚眾相謀動以錢糧差徭控告官長借大題爲斂錢之計或訟棍扛幫不勝復以詐贓斃命控告書差借延訟爲舖啜之計種種幻態不可言狀一經批飭提省則奸計得行而無辜受累嗣後省控之案院司不可輕於批准情節支離批詞卽宜斬截不可用姑准飭府查復等語少准一謊狀卽多造一陰功其必須准理者不可輕批提省但責成本管知府秉公研訊或委賢明之員前往會訊其提省審辦者則須剖分皁白實究虛坐理無兩是勢不兩存近來直隸京控省控之案一經發交讞局平日則多

方彌縫臨結則一味含糊告官得實者承審官迴護同僚但議以不應重不應輕之咎告吏得實者承審官刪改情節但科以笞杖及除名之罪其控告全係虛誣者則又曲庇奸民惟恐反噬但以懷疑妄控及愚民無知等語了結之奏交之案十審九虛刁訟之民十虛九赦問官皆自命爲和事之人訟棍皆立身於不敗之地阜白不分莫此爲甚自今以往凡京控省控重案本部堂率屬議獄之初卽當確究虛實審實者卽治被告以應得之罪虛誣者卽治奸民以誣告之罪黑白較然不稍含混一變向來麻木不仁之習訟棍之積猾玩法者除照律科斷外再加嚴刑以痛苦之本部堂懲治他犯恪遵律例獨至治盜賊訟

棍則當格外從嚴冀以救一時之弊有識者尙鑒亮焉

第十條獎借人才變易風俗

嚴懲訟棍邪氣雖除而正氣不伸則風俗仍難挽回風俗之美惡主持在縣官轉移則在紳士欲厚風俗不得不培養人才古者鄉大夫賓興賢能考其六德六行六藝而登進之後世風教日頽所謂六德者不可得而見矣至於六行曰孝友睦婣任卹孝友則宗族敬服睦婣則親黨敬服今世未嘗無此等人也任則出力以救急卹則出財以濟窮今世亦未嘗無此等人也六藝曰禮樂射御書數今世取士用文字詩賦經策其事雖異其名曰藝則一也今之牧令卽古鄉大夫之職本有興賢舉能之

責本部堂分立三科以求賢士凡孝友爲宗族所信睦嫻爲親黨所信者是爲有德之科凡出力以擔當難事出財以襄成善舉者是爲有才之科凡工於文字詩賦長於經解策論者是爲有學之科仰各州縣採訪保舉一縣之中多者五六人少者一二人其全無所舉及舉而不實者該牧令皆予記過教官如確有所見亦可隨時稟保舉有德者本部堂或寄扁額以旌其宅或延致來省賜之酒食餽之儀物舉有才者本部堂或飭屬派充團長酌給薪水或調省一見札令幫辦捕務舉有學者本部堂或薦諸學使量加獎拔或召之來省肄業優給膏火每州每縣皆有數人爲大吏所知則正氣可以漸伸奸宄因而斂迹此

雖與清訟無涉而端本善俗尤在於此用一方之賢士化一方之莠民芳草成林荆棘不鋤而自悴鸞鳳在境鷓臯不逐而自逃諸良吏無以爲迂而忽之

曉諭新募鄉勇

爲曉諭事照得本部堂招你們來充當鄉勇替 國家出力每日給你們的口糧養活你們均是

皇上的國帑原是要你們學些武藝好去與賊人打仗拚命你們平日如不早將武藝學得精熟將來遇賊打仗你不能殺他他便殺你你若退縮又難逃 國法可見學的武藝原是保護你們自己性命的若是學得武藝精熟大膽上前未必卽死一經退後斷不得生此理甚明況人之生死有命存焉你若不該死時雖千萬人將你圍住自有神明護佑斷不得死你若該死就坐在家中也是要死可見與賊打仗是怕不得的也可不必

害怕於今要你們學習拳棍是操練你們的筋力要你們學習鎗法是操練你們的手腳要你們跑坡跳坑是操練你們的步履要你們學習刀矛鈚叉是操練你們的技藝要你們看旗幟聽號令是操練你們的耳目要你們每日演陣住則同住行則同行要快大家快要慢大家慢要上前大家上前要退後大家退後是操練你們的行伍要你們齊心你們若是操得筋力強健手足伶俐步履便捷技藝純熟耳目精明而又大家齊心膽便大了一遇賊匪放礮的放礮放鎗的放鎗刀矛鈚叉一齊上前見一個殺一個見十個殺十個那怕他千軍萬馬不難一戰成功你們得官的得官得賞的得賞上不負

皇上深仁厚澤下卽可慰本部堂一片苦心本部堂於爾等有厚望焉今將操練日期開列於後

一每逢三六九日午前本部堂下教場看試技藝演陣法

一每逢一四七日午前著本管官下教場演陣並看抬鎗鳥鎗

打靶

一每逢二八日午前著本管官帶領赴城外近處跑坡搶旗跳坑

一每逢五逢十午前卽在營中演連環鎗法

一每日午後卽在本營演習拳棒刀矛鈚叉一日不可閒斷

一臨陣有能殺賊一名者功賞銀十兩並賞八品軍功

一殺賊二名者功賞銀二十兩並賞六品軍功

一殺賊三名以上者除功賞銀三十兩外隨卽奏請發營以千

把總補用

一拏獲長髮賊每名賞銀二十兩短髮賊每名賞銀十五兩

一拏獲賊馬一匹卽以其馬充賞如不願要馬將馬繳呈賞銀
十兩

一搶獲火藥每桶賞銀五兩

一搶獲鉛子每桶賞銀三兩

一搶獲大礮一尊賞銀十兩小礮一尊五兩

一搶獲鳥鎗一桿賞銀三兩

一搶獲刀矛旗幟每件賞銀二兩

一打仗奮勇當先雖未得功亦隨時酌給賞號落後者不賞如以已物詐功冒賞者查出網責四十棍革除臨陣退縮者斬殺假冒功者梟首示眾

一打仗陣亡者照營制賜卹銀五十兩燒埋銀十兩

一傷分三等頭等賞銀三十兩二等賞銀二十兩三等賞銀十兩

一臨陣回身傷在背者不賞

一詐傷冒功者查出網責四十棍革除

一 按唐書地理志云出隸遼西十縣軍屯

一 縣制同隸遼西十縣軍屯

兩

一 按唐書地理志云出隸遼西十縣軍屯
一 按唐書地理志云出隸遼西十縣軍屯

一 按唐書地理志云出隸遼西十縣軍屯

一 按唐書地理志云出隸遼西十縣軍屯
一 按唐書地理志云出隸遼西十縣軍屯
一 按唐書地理志云出隸遼西十縣軍屯
一 按唐書地理志云出隸遼西十縣軍屯

諭賊目林啟容

丙辰十月十三日

蓋聞知幾爲哲人識時爲俊傑時危勢去而不覺悟則爲下愚
徒爲智者之所鄙笑也自洪秀全楊秀清倡亂以來蔓延十省
擄船數萬自以爲橫行無敵乃渡黃河者數十萬人屠戮殆盡
片甲不返匹馬不歸而賊勢頓衰本部堂辦理水師分布湖北
江西燒燬逆舟截其糧源而賊勢更衰洎今年七月韋昌輝誅
殺楊秀清凡東嗣君西嗣君及楊氏宗族官屬斬刈無遺石達
開自武昌歸去幾不免於殺害金陵內變而賊勢於是乎大衰
想爾林啟容亦深知之而深恨之痛哭而無可如何也本部堂
前年在九江時統率水陸環攻潯城林啟容兵單糧少堅守不

屈本部堂嘉爾有強固之志官軍拔營以後爾未嘗屠殺百姓本部堂嘉爾無殃民之罪爾在賊黨中可謂傑出矣昔之統理賊黨懾服眾心者楊秀清也能知爾能用爾者楊秀清也今楊氏既誅誰能統理而服眾乎誰能知爾而用爾乎爾與石達開皆楊氏之黨韋昌輝必思所以除之韋與石不兩立非韋殺石卽石殺韋縱使石能勝韋而韋氏宗族甚多兵卒甚強冤冤相報豈有已時爾等終不免爲韋黨所害此爾目前之大患也江西各府廣東新附之賊居多外雖歸順心實猜忌如周鄧汪盧諸人甚不願受爾等之約束楊秀清未死彼尙畏爾之強楊秀清既誅彼已毫無畏憚一旦反顏相向廣西金田之老賊必爲

廣東新賊所仇殺此亦爾將來之大患也官兵攻勦爾尙有可
防守惟廣東之賊叛爾韋氏之黨仇爾則防之不勝其防念爾
林啟容不死於官兵則死於廣東之賊不死於東賊則死於韋
氏之黨萬無倖全之理豈不哀哉本部堂嘉爾有一節之可取
特諭招降爾能薙髮投誠立功贖罪 奏明

皇上當以待張家強之例待之可以保身首可以獲官爵並可
誅戮韋黨以快私讐一舉而三善備計之上也若執迷不悟抗
違

天誅韋石爲鷸蚌之持官兵收漁人之利楊氏若在爾死猶有
薄名楊氏旣滅爾死不值一錢爲禍爲福在爾一心決之熟思

吾言無遺後悔或願或否速行稟復此諭

諭巡捕門印簽押

凡爲將帥者以不騷擾百姓爲第一義凡爲督撫者以不需索屬員爲第一義督撫與屬員交涉以巡捕門印簽押三處爲最明日起早經過地方卽是與州縣交涉之始茲特嚴定條約願巡捕門印簽押敬聽而牢記之

第一不許凌辱州縣人無貴賤賢愚皆宜以禮貌相待凡簡慢傲惰人施於已而不能堪者已施於人亦不能堪也往嘗見督撫過境其巡捕門印簽押及委員等見州縣官皆有倨侮之色嚴厲之聲實可痛恨今當痛改惡習凡見州縣及文武屬員總以和顏遜詞爲主不可稍涉傲慢致啟凌辱之漸

第二不許收受銀禮凡自愛者絲毫不肯苟取於人凡收人禮物其初不過收茶葉小菜之類漸而收及鞍馬衣料漸而收及金銀古玩其初不過投贈之情漸而笑索授意漸而誅求逼勒賄賂公行皆始於此嗣後我巡捕門印簽押務各自愛不准收受絲毫禮物卽茶葉小菜至親密友贈送微物若非稟明本部堂再三斟酌者概不准收倘有隱瞞收受者重則枷號棍責輕則遞解回籍

第三不許薦引私人凡巡捕門印簽押勢之所在人或不敢不從或其親族或其舊識或薦至各將營盤或薦入州縣衙門縱有過失互相隱蔽勾通袒護爲患甚大自此次告戒之後概不

准薦人入將領之營入州縣之署亦不准各營各署收受

以上三條巡捕門印簽押三處各寫一分貼於座右如其自度不能卽趁早告退若其在此當差卽小心凜遵本部堂旣告戒爾等亦加倍自行儆惕凡接見文武屬員無論大小雖至佐樞外委亦必以禮貌相待斷不以厲色惡聲加人至送禮物者一概謝絕不收無論茶葉小菜以及裁料衣服書籍字畫古玩器皿金銀食物均皆不收亦不薦人入武員之營文員之署此三者本部堂若犯其一准各隨員指摘諫爭立卽更改

咸豐十年五月諭巡捕門印簽押三處

以禮待下以誠待民以信待士

百本職堂等出其言則民歸之

以命論身則其言不亦亦不與人

勿謂國不效也然其言亦不亦亦

其言亦不亦亦亦亦亦亦亦亦亦

其言亦不亦亦亦亦亦亦亦亦亦

其言亦不亦亦亦亦亦亦亦亦亦

其言亦不亦亦亦亦亦亦亦亦亦

其言亦不亦亦亦亦亦亦亦亦亦

諭天津士民示

自咸豐三四年閒本部堂卽聞天津民皆好義各秉剛氣心竊嘉之夫好義者救人之危難急人之不平卽古所謂任俠之徒是也秉剛氣者一往直前不顧其他水火可赴白刃可蹈之類是也斯固屬難得之質有用之才然不善造就則或好義而不明理或有剛氣而無遠慮皆足以僨事而致亂卽以昨五月廿三日之事言之前聞教堂有迷拐幼孩挖眼剖心之說爾天津士民忿怒洋人斯亦不失爲義憤之所激發然必須訪察確實如果有無眼無心之尸實爲教堂所掩埋如果有迷拐幼孩之犯實爲教堂所指使然後歸咎洋人乃不誣枉且卽有真憑實

據亦須稟告官長由官長知會領事由領事呈明公使然後將
迷拐知情之教士挖眼剖心之洋人大加懲治乃爲合理今並
未搜尋迷拐之確證挖眼之實據徒憑紛紛謠言卽思一打洩
忿旣不稟明中國官長轉告洋官自行懲辦又不稟明官長擅
殺多命焚毀多處此爾士民平日不明理之故也我能殺彼亦
可以殺報我能焚彼亦可以焚報以忿召忿以亂召亂報復無
已則天津之人民房屋皆屬可危內則勞 皇上之憂慮外則
啟各國之疑衅十載講和維持多方而不足一朝激變荼毒萬
姓而有餘譬如家有子弟但逞一朝之忿而不顧禍患入於門
庭憂辱及於父兄可乎國有士民但逞一朝之忿而不顧干戈

起於疆場憂危及於君上可乎此爾士民素無遠慮之故也
津郡有好義之風有剛勁之氣本多可用之才然善用之則足
備千城誤用之則適滋事變聞廿三日焚毀教堂之際土棍遊
匪混雜其中紛紛搶奪財物分攜以歸以義憤始而以攘利終
不特爲洋人所譏卽本地正紳亦羞與之爲伍矣本部堂奉

命前來一以宣布

聖主懷柔外國息事安民之意一以勸諭

津郡士民必明理而後可言好義必有遠慮而後可行其剛氣
保全前此之美質挽回後日之令名此後應如何仰體聖意

和戢遠人應如何約束同儕力戒喧鬩如何而懲既往之咎如

何而靖未平之氣仰讀書知理君子悉心籌議分條稟覆特諭

照復洋人

爲照復事同治九年六月二十四日本閣部堂接得貴大臣照會內稱現在未能極力彈壓立拏兇犯正法等因查五月二十三日之案滋事兇犯現已嚴飭新任道府趕緊查拏斷無任令兇徒久稽顯戮之理只緣是日津民聚眾過多不能指實何人爲首何人爲從近日訪得數名已令其先行拏案嚴刑拷訊務令供出夥黨按名緝獲處以極刑以申中國之法以紓貴國官商之恨大約數日之內必可弋獲多名斷不至再事遲延貴大臣儘可放心至照會內稱天津府縣及提督陳國瑞議以抵命等語查陳國瑞以客官路過天津本屬事外之人前准照會

云云該提督現在都門本閣部堂昨已咨請總理衙門就近傳訊應俟總理衙門訊明咨復到日再行核辦至此案前任府縣辦理不善本閣部堂到津後卽將該員等先行撤任又以案情重大該府縣事前旣不能防範事後又不能速拏兇徒業經奏明大皇帝將該府縣革職從重解交刑部治罪在案若如照會所稱必將該府縣議以抵命查審讞極刑必須有可誅之心或有顯著之惡該府縣並非下手殺人之入又無絲毫主使確據本閣部堂未能指實其罪之所在難以照辦因思貴大臣當明晰該府縣二人有應抵命之罪可請逐層說明本閣部堂得有二人罪狀實在憑據自能公平辦理再本閣部堂到津後查

明天津府有事後之三件事一係五月二十五六閒河東匪人搶蘇老義等教民數家張守卽前往彈壓一係有一教民與一民人因帳目在府涉訟張守卽將民人枷號示眾一係府署把門者係教民該府欲訪查兇手卽令教民密訪兇犯懸有重賞現在此人仍在府署當差此三事雖小足見知府有保護教民之心無傷害法國之意至天津縣劉令雖無保護確據而亦無傷害教堂之心貴大臣如查有府縣罪狀卽請一一開示以便轉交刑部定議中國遇有大獄皆由部臣作主疆臣不能擅專爲此再商貴大臣請煩細核見示須至照會者

大皇帝親臨大馬路觀禮並親示軍至照會清

國交際禮節至觀中國國旗大總統由時道台主禮引不備禮事
至山外禮堂心貴大臣或查商禮親舉禮贈請一一照承以對
心誠始得當國之意至天事報國合辦無對黨報將前夜海
軍大臣人氏親自督帶軍下並三軍軍中鼓與鼓亦自對勸修列
國首則於其時親到前查與手賜合婚因與海與軍總行軍
國人國旗自封佩者為戰守時節與人無對承服一射佩者
佩於左腰佩於右腰承服於前前其腰佩一射高一燈以對一
天事報國禮節至觀禮事一射至民二十正六開而軍中人

將赴天津示二子

余卽日前赴天津查辦毆斃洋人焚毀教堂一案外國性情凶悍津民習氣浮囂俱難和叶將來構怨興兵恐致激成大變余此行反覆籌思殊無良策余自咸豐三年募勇以來卽自誓效命疆場今老年病軀危難之際斷不肖吝於一死以自負其初心恐邂逅及難而爾等諸事無所稟承茲略示一二以備不虞余若長逝靈柩自以由運河搬回江南歸湘爲便中間雖有臨清至張秋一節須改陸路較之全行陸路者差易去年由海船送來之書籍木器等過於繁重斷不可全行帶回須細心分別去畱可送者分送可毀者焚毀其必不可棄者乃行帶歸毋貪

瑣物而花途費其在保定自製之木器全行分送沿途謝絕一切概不收禮但水路略求兵勇護送而已

余歷年奏摺令夏吏擇要鈔錄今已鈔一多半自須全行擇鈔鈔畢後存之家中畱於子孫觀覽不可發刻送人以其閒可存者絕少也余所作古文黎尊齋鈔錄頗多頃渠已照鈔一分寄余處存稿此外黎所未鈔之文寥寥無幾尤不可發刻送人不特篇幅太少且少壯不克努力志亢而才不足以副之刻出適以彰其陋耳如有知舊勸刻余集者婉言謝之可也切囑切囑余生平略涉儒先之書見聖賢教人修身千言萬語而要以不伎不求爲重伎者嫉賢害能妒功爭寵所謂怠者不能修忌者

畏人修之類也求者貪利貪名懷土懷惠所謂未得患得既得患失之類也伎不常見每發露於名業相侔勢位相埒之人求不常見每發露於貨財相接仕進相妨之際將欲造福先去伎心所謂人能充無欲害人之心而仁不可勝用也將欲立品先去求心所謂人能充無穿窬之心而義不可勝用也伎不去滿懷皆是荆棘求不去滿腔日卽卑污余於此二者常加克治恨尙未能埽除淨盡爾等欲心地乾淨宜於此二者痛下工夫并願子孫世世戒之附作伎求詩二首錄右

歷覽有國有家之興皆由克勤克儉所致其衰也則反是余生平亦頗以勤字自勵而實不能勤故讀書無手鈔之冊居官無

可存之贖生平亦好以儉字教人而自問實不能儉今署中內外服役之人廚房日用之數亦云奢矣其故由於前在軍營規模宏闊相沿未改近因多病醫藥之資漫無限制由儉入奢易於下水由奢反儉難於登天在兩江交卸時尙存養廉二萬金在余初意不料有此然似此放手用去轉瞬卽已立盡爾輩以後居家須學陸梭山之法每月用銀若干兩限一成數另封秤出本月用畢只准贏餘不准虧欠衙門奢侈之習不能不徹底痛改余初帶兵之時立志不取軍營之錢以自肥其私今日差幸不負始願然亦不願子孫過於貧困低顏求人惟在爾輩力崇儉德善持其後而已

孝友爲家庭之祥瑞凡所稱因果報應他事或不盡驗獨孝友則立獲吉慶反是則立獲殃禍無不驗者吾早歲久宦京師於孝養之道多疏後來展轉兵閒多獲諸弟之助而吾毫無裨益於諸弟余兄弟姊妹各家均有田宅之安大抵皆九弟扶助之力我身歿之後爾等事兩叔如父事叔母如母視堂兄弟如手足凡事皆從省嗇獨待諸叔之家則處處從厚待堂兄弟以德業相勸過失相規期於彼此有成爲第一要義其次則親之欲其貴愛之欲其富常常以吉祥善事代諸昆弟默爲禱祝自當神人共欽溫甫季洪兩弟之死余內省覺有慚德澄侯沅甫兩弟漸老余此生不審能否相見爾輩若能從孝友二字切實講

求亦足爲我彌縫缺憾耳

附忮求詩二首

善莫大於恕德莫凶於妬妬者妾婦行瑣瑣奚比數已拙忌人
能已塞忌人遇已若無事功忌人得成務已若無黨援忌人得
多助勢位苟相敵畏偪又相惡已無好聞望忌人文名著已無
賢子孫忌人後嗣裕爭名日夜奔爭利東西驚但期一身榮不
惜他人污聞災或欣幸聞禍或悅豫問渠何以然不自知其故
爾室神來格高明鬼所顧天道常好還嫉人還自誤幽明叢詬
忌乖氣相迴互重者裁汝躬輕亦減汝祚我今告後生悚然大
覺寤終身讓人道會不失寸步終身祝人善會不損尺布消除

嫉妬心普天零甘露家家獲吉祥我亦無恐怖

右不忤

知足天地寬貪得宇宙隘豈無過人姿多欲爲患害在約每思
豐居困常求泰富求干乘車貴求萬釘帶未得求速償旣得求
勿壞芬馨比椒蘭磐固方泰岱求榮不知饜志亢神愈汰歲燠
有時寒日明有時晦時來多善緣運去生災怪諸福不可期百
殃紛來會片言動招尤舉足便有礙戚戚抱殷憂精爽日凋瘵
矯首望八荒乾坤一何大安榮無遽欣患難無遽憝君看十人
中八九無倚賴人窮多過我我窮猶可耐而況處夷途奚事生
嗟愼於世少所求俯仰有餘快俟命堪終古曾不願乎外

右不

求